



E Commis-Vogayeur.

Fléck, e Schneider, ass mat sengem Gesell Pitt am Atelier. Fléck stët beim Desch ze bigeln, Pitt setzt op engem aneren Desch d'Foschfiédem eraus ze ze'en.

Fléck: Dajé, Pitt, huos de d'Fiédem nach net aus dèr Box eraus? Ech hätt s'an dèr Zeit schons gezrass!

Pitt: En Ablack, Méschter, hei hun ech ê vun engem Meter läng. Wann ech emol Méschter sind

Fléck: Du? Ges senger Liewe kê Méschter! Fullefänkert! E Méckejâr! Ha! Fir e Méschter ze gin muss ên aner Naupen hun we's du!

Pitt: Ech schaffen dach emmer!

Fléck: Nu rasonne'er net vill, soss . . .! Du göss schons vill ze steif. E Schneider brauch net so' deck ze sin.

Pitt: Der huot recht, Méschter, ech spieren, dat Setzen ass mir net gutt.

Fléck: Wâr d'Leien der besser?

Pitt: Verstitt mech gutt. Ech mengen, ech hätt besser dat Handwîrk ze stiéchen, an . . .

Fléck: a Rentier ze spillen . . .?

Pitt: Nèn, et wâr èppes, wat mir apart gutt ging!

Fléck: Zockerbäcker?

Pitt: Nèn, am allerle'fste wâr ech Commis-voyageur.

Fléck: Fir mat ferdeg Knäplächer ze résen?

Pitt: Mâcht de Spott net. Dat ass e sche'ne Beruf.

Fléck: Kuck, Pitt, wanns du eng Ke'er Commis ges, da gin ech Popst.

Pitt: Dir könnt neischt soen, Méschter! Ei, durech d'Land ze rullen an d'Schneideren ze beschwindelen!

Fléck: Do hu mir et jo! Kuck, Pitti, eidel Spullen, Lompen, gebrache Nôlen a Spengeln, âl Bitzmaschinen, dat wâren eso' Artikelen mat dénen ass du vif a licht en Hèr ge'fs! (Et klappt un der Dir.)

Fléck: Entrez!

Schick: (e Commis-voyageur, kent eran mat zwe'n deck Koffren an der Hand.) Bonjour, Monsieur Fléck, a we' gêt et iech dann?

Fléck: Ech danke! Merci! Dann huot Der d'Ke'er och erem!

Schick: Meija! Mir hun de' nei Saisonsartikele kritt. Wonnersche'n Sâchen! Wann der erlabt, pâcken ech emol aus.

- Fléck:* Ir Der elo auspâckt, soll der wössen, dass de' lèscht Sendong net zuvill gro'ssarteg ausgefall war!
- Schick:* O! O! O! A we' dat dann, Hèr Fléck!
- Fléck:* Onse Pitt hat eng Box dervu kritt, an en huot se schons gezrass.
- Pitt:* Jo, Hèr Commis, kuckt emol! Wann ech Commis wär
- Schick:* Gewess, gewess, wann ên eso' iwert d'Descher rutscht, da ge'f Liéder zreissen. Ech menge, Pitti, du huos s'express gezrass! Pitti! Pitti!
- Pitt:* Méschter, dat do ass dèr ên, we' der gesot hat!
- Schick:* Ech? Fömmen de' Hèren eng Zigarett? (rècht en den Etui — sie stiéchen se hannert d'O'er.)
- Fléck a Pitt:* Merci, Hèr Schick!
- Schick:* Solle mer dann nom Geschäft kucken? Wann ech geliff, hei hu mer en Dessin, so' hun ech engem Schmèlzhèr e Costüm verkaft.
- Fléck:* Brauche mir net.
- Schick:* Aha! An hei hu mer dat Feinst vum Feinsten, modern an distingue'ert, den Hèr Staatsminister . . .
- Fléck:* Dèr hu mir och kèng hei!
- Schick:* Bien! Très bien! Lo weisen ech iech meng Spezialite't: en Dessin dén zitt we' Zucker. Direktren a Professerren . . .
- Fléck:* Dat sin eiser Leit kèng!
- Schick:* Wat fir Leit huot der dann eigentlech hei?
- Fléck:* Ons Konne wölle sche'n a gutt a bölleg kafen, èppes wat net schmotzt a net zreisst, an dat eso' no engem Joer ere'scht bezuolen.
- Schick:* O mir hun allerhand, mir wèrde schons dat richtegt fannen! Kuckt iech emol det Muster! Dat verkafe mer 10 Frang bölleger we' et ons kascht, nemme fir d'Konkurrenz rosen ze mâchen.
- Fléck:* Dir musst awer net mengen dass mir èr Konkurrenz wären.
- Schick:* Neischt! Neischt! Kaft nemmen! Kaft, mir gin et jo gèr! An dat gefällt iech net? Dat ass jo ganz interessant, mais, wèll ech iech gutt wöll, ge'f ech iech et nawèll 5 Frang bölleger.
- Fléck:* Lo kann et nun awer neischt me' sin!
- Schick:* O wat sit dir e Schelliem! Abé, da friet emol dat hei, de' rengst Woll, an den Dessin! We'?
- Fléck:* Et könnt nach me' deck sin!
- Schick:* Ah, me' deck! Da friet dat hei!
- Fléck:* Jo, dat ass zevill deck!

Schick: Hèr Fléck, dir verstitt jo ganz vill vun de Stefter, mais bedenkt emol wat dat ass! 1000 m den Dag verkafen ech dervun! Mir brengen et net zur Zeit ferdeg! Ech könnt iech Bre'f weisen! Aus Amerika krut ech Schreiwes. Wann ech iech soen, dass mer a China liweren, da gléft der es net — — det Stoff . . .

Fléck: Et geseit ê Pareis derdurech!

Schick: Ah, dir hätt gèr gutt geschlosst! Da kuckt! Hei könnt der Wässer derdurech shedden.

Fléck: We' durech eng Seibecken.

Schick: Ma da kuckt emol, eso' eng Qualite't fand dir net me'! D'Militärmusek . . .

Fléck: Ka gutt blösen.

Schick: D'Militärmusek huot sech nei Costüme bestallt.

Fléck: Dann ass et secher neischt fir ons um Duoref. Ech sot iech jo wat mir brauchen. Dese Moment brauche mir — neischt.

Schick: Hèr Fléck, mâcht mer nemmen eng Grimmelches klinzeg Bestellong.

Fléck: Brauche neischt.

Schick: Nemmen eng Dose Costümen.

Fléck: Neischt. Ech soe neischt. (Et schellt, de Méschter gêt an de Butek.)

Schick: (zum Pitti) So emol, we' ass dat, dass dei Méschter haut eso' krideleg a spatz ass?

Pitti: Ja, mei le'wen Hèr, ech wëss et net, en ass och eso' mat mir!

Schick: Gefällt et dir da net hei?

Pitti: O, et gefällt mer jo, mais . . .

Schick: Ja?

Pitti: Mais Commis sin, ass dach vill me' sche'n!

Schick: Sche'n! A wo' kanns du eso' èppes soen! Den Hals wond vu schwätzen, durech d'Land ze wänzeln bei Rén a Schne' a Wand, an dann d'Roserei! Kuck dei Méschter! Ass dat nu net fir ze baschten! A wat ê baschten dêt, dat ass, et darf ên emol net ze baschten, et muss ê nach lâchen . . .

Pitti: Ech wär awer eso' gèr Commis!

Schick: Arme Jong! Ha! (bedenkt sech) Kuck, wanns du mer hellefs, dass ech eng Bestellong vun dengem Méschter kre'en, dann denken ech un dech.

Pitti: O, ech ging eso' gèren mam Zug a mam Auto.

Schick: Hellef mer e beschen schwätzen . . .

Pitti: Ho, de Méschter get be's, wann ên de Mond obdêt, an et huot ê neischt ze soen! — —

Schick: Fèrt net, du geseis, ech fèrte jo och net.

Fléck: (kent erem) Alt erem dèr Cliangen ên: Sche'n a bölleg a gutt an net deier!

Schick: Lösse mer emol an dém anere Koffer kucken. Ja wirklech, dir sit och geplot, Schneider sin, ass nach lâng net eso' licht — We' ass et mat de Boxeknäpp?

Fléck: Nach genug!

Pitti: Ma nèn. Méschter, de' lèscht . . .

Fléck: Pitti, we' ass et mat de Foschiédem?

Pitti: Gutt, gutt, Méschter, nach vólleg, mais Boxeknäpp si kèng me' do!

Schick: Ma dann huolt alt eng Dose Gross!

Fléck: Ech soe jo, ech brauch kèng.

Pitti: Méschter, dat do sin awer sche'ner.

Fléck: D'Knäpp sin zo' — ferdeg.

Schick: An d'Blocken? Kuckt, e neie Modell, patent. Wann ech erem kommen, sin se schons vill me' deier. Soll ech en 50 Keschten note'eren?

Pitti: Blocke brauche mer emmer.

Schick: Dat ass wo'er!

Fléck: Wien ass hei Méschter?

Pitti: Dir, Méschter, mais et si sche' Blocken . . .

Schick: A Bretellen, Huosebändeln, Zwir, Nolen, Spengeln.

Pitti: Nole, Méschter!

Fléck: Nê, Pitti.

Schick: Seid, Kreid, Meteren.

Pitti: Ei, wann ech Méschter wär!

Fléck: Lo pâckt der èr Sâche sche'n an, wèll ech bestellen neischt, gur neischt!

Schick: Also neischt. Mitt gâng, mitt geschwat fir neischt.

Pitti: Méschter!

Fléck: Nu nach ê Würt, an ech geheien der de Meter an de Kapp.

Pitti: Méschter . . .

Fléck: Hâls du de Mond.

Schick: Ditt dem Jong neischt, soss . . .

Pitti: Ma da lauschtert Méschter

Fléck: Wöls de, oder wöls de net.

Pitti: Ma dann do, ech wollt soen, ech hätt d'Fiédem eraus. (Werft em d'Box dur.)

Fléck: Ma da so et a schwätz! Dat kann ech net richen.

Schick: Abé, wann der mer neischt bestellt, da reissen ech iech eng!

Fléck: Dir mir eng reissen? A wat dann?

Schick: O, ech we'sst wat. Jé, bestellt éppes Klènges!

Fléck: Net fir en Centim.

Schick: Wann ech da ge'f e Costüm un iech bestellen, ge'f dir dann och nach neischt u mir bestellen?

Fléck: A eso'? Dat wöllt der mer reissen. Mir de Costüm net bezuolen. Nix da! Kê Costüm a kèng Bestellong.

Schick: Abé, da soen ech iech Beschêd: De Jong do gêt elo mat mir! Mâcht èr Arbecht eleng.

Fléck: Ass dat wo'er, Pitti.

Pitti: Jo, et ass wo'er. — Ech Commis!

Fléck: (helt de Meter) Da vif eraus mat iech allebe'd! Wien ass Méschter hei? Da git elo se'er! Herrgott! An ech soen e kritt kèng Bestellong! —

